

Cluinnidh tu Seonag NicGriogair a' toirt seachad geàrr-chunntas air eachdraidh Drochaid an Eilein Sgitheanaich.

Pàirt 1

An e eilean a tha anns an Eilean Sgitheanach? Canaidh cuid nach e on a chaidh Drochaid an Eilein a thogail. Dh'fhosgail an drochaid ann an 1995. Roimhe sin, 's e bàt-aiseig a bheireadh luchd-siubhail air ais agus air adhart eadar Caol Loch Aillse air tìr-mòr na h-Alba agus Caol Acain air taobh sear an Eilein Sgitheanaich.

'S e eilean air leth bòidheach a tha anns an Eilean Sgitheanach agus bidh daoine às gach ceàrn den t-saoghal a' tadhal air. Bha àrdachadh mòr de luchd-turais anns na h-ochdadan. Bhiodh daoine ann an sreathan mòra de chàraichean a' feitheamh air na bàtaichean-aiseig anns an t-samhradh gus an toirt a-null agus a-nall. Thòisich an riaghaltas air beachdachadh air drochaid a thogail.

Dh'innis an riaghaltas ann an 1989 gun deigheadh drochaid a thogail le companaidh phrìobhaideach. Chuireadh a' chompanaidh cìs air càraichean a chleachdadh an drochaid airson grunn bhliadhnan gus am faigheadh i a cuid airgid air ais agus gus am faigheadh i prothaid às a' ghnòthach. Chaidh gabhail ris a seo le Ball-pàrlamaid na sgìre agus leis a' chomhairle ionadail. Dhèanadh an drochaid feum mòr dhan sgìre. Bhiodh e na b' fhasa do luchd-turais ùine a chur seachad air an eilean. Chuireadh seo gu mòr ri eaconamaidh na sgìre. Thug an togail trì bliadhna agus chosg e còrr 's fichead millean not.

Pàirt 2

Bho thùs, 's e gnòthach connspaideach a bh' anns an drochaid. Cha b' fhada gus an robh aig luchd-siubhail ri sia notaichean a phàigheadh gach turas a dhràibheadh iad thairis air an drochaid. Chùm luchd-iomairt a-mach gur e an drochaid an rathad a bu daoire san Roinn Eòrpa. Bha drochaidean eile gan togail leis an riaghaltas ann an sgìrean iomallach na h-Alba agus anns na h-eileanan aig an àm seo a bhiodh an-asgaidh dhan luchd-cleachdaidh. Anns an Eilean Sgitheanach bha cuid den bharail nach bu chòir cìs a bhith air an drochaid aca fhèin. Bha gu leòr dhaoine nach robh deònach na cìsean a phàigheadh. Chaidh mu chòig ceud dhiubh seo a chur an grèim. Bha aca ri nochdadh anns a' chùirt ann an Inbhir Pheofharain agus càin a phàigheadh.

Dh'fhàs an drochaid gu bhith na cùis mhòr phoilitigeach. Thuig an riaghaltas gum feumadh iad èisteachd ris an t-sluagh. An toiseach chuir iad air dòigh sgeama gus am biodh muinntir na sgìre a' pàigheadh cìs na bu lugha. Chaidh fàilte a chur air seo ach cha robh muinntir an eilein fhathast riarachte. Ann an 2004, cheannaich an riaghaltas an drochaid bhon chompanaidh a thog i airson seachd air fhichead millean not. Mu dheireadh thall, dh'fhaodadh luchd-siubhail a dhol air ais 's air adhart air an drochaid gun sgillinn a phàigheadh.